

Mintga giast in retg

San Murezzan: Confiserie Hanselmann

DA GION NUTEGN STGIER / ANR

■ In local a San Murezzan nua che la prominenzia va en ed or e quai di per di è la Confiserie e Cafè Hanselmann. Il manaschi è ina chasa cun ina tradiziun da passa 120 onns. Esser a San Murezzan e betg ir en quel local nobel è strusch ina persuna che fa. Bunamain mintga lieu turistic en l'entira Svizra ha ina confiserie e cafè ch'è in affar da renum, in manaschi cun la meglra pastizaria e cun dulschims da tuttas sorts. Quels manaschis vegnan er numnads «Tee-Room» e tar quella categoria appartegna er il Hanselmann a San Murezzan. La chasa da passa 120 onns è situada sco strusch in'otra a San Murezzan e quai en ina via senza traffic, ina giassa be per peduns e là nua che la prominenzia e noblezza passan mintga di. Avant quatter onns han ils proprietaris da la chasa, ils ertavels Hanselmann, renovà cumplet il bajetg istoric uschia ch'el sa preschentà oz en in vestgè singular e frestg.

Confiserie e Cafè Hanselmann in success

Oz maina la quarta generaziun l'affar tradiziunal e quai anc adina en ina moda da la «scola veglia», per duvrar la translaziun

da la versiun tudestga per in local nua che tut è tenor etichetta. L'istorgia da la Confiserie e Cafè Hanselmann è in vair success, èn ils products da quel manaschi exquisits, bain preschentads e cunzunt er ina buntad. La collecziun dals dulschims e da las dulscharias è uschè vasta che blers han fadia da sa decider per in dulschim cun esser tuts er insatge per l'egl. Er passa 120 onns suenter l'avertura da la furnaria, pastizaria e cafè è il manaschi anc adina in lieu da s'entupar il suentermezdi, mangiar turta ed er il locals per sa mussar.

Vers 60 emploiads

Las damas ed ils signurs che portan il cafè, e quai «im Kännchen», èn vestgids alv e nair, tuts èn gentils, dentant sin distanza tar mintga giast. En quel local han tuts l'impressiun dad esser in retg e dad esser en in mund da paraulas. Tuaglias alvas èn anc adina ina da las marcas dal Cafè Hanselmann, dasper tut quai che vegn servì cun ina calma e cun ina luschezza. La bun'adressa è bain in local per persunas pli sin ils onns, dentant er la generaziun pli giuvna stema il bun servì gentil e sa lascha ir bain il suentermezdi cun turta e cafè. Da stagiun occupa schia il travagl radund 60 emploiads e da quels er intgins emprendists.



Sonja e Markus Wassmer che mainan cun plaschair l'affar da cigaras Davidoff a San Murezzan.

FOTO G. N. STGIER

«Davidoff»: La campionesa da las cigaras

Visita en l'affar da cigaras Davidoff

DA GION NUTEGN STGIER / ANR

■ A San Murezzan sa chatta ina da las tschintg butias da cigaras «Davidoff», da la classa eleganta ch'è dat en Svizra. Manada vegn la filiala cun bier cor da Sonja Wassmer. A San Murezzan è quella butia a la Via Maistra la marca sch'i va per cigaras da buna qualitat e da bun gust. Tar ils amis da cigaras è Davidoff già decennis in garant, tutgan ellas er an Svizra tar las cigaras las pli popularas. Passa 100 onns è Davidoff in num che segna per ina gronda paletta da cigaras da la Republica dominicana. En Svizra èn las cigaras da la marca Davidoff il numer in, ed er a San Murezzan tar Sonja Wassmer èn ellas las cigaras che vegnan cumpradas il pli savens. La dunna maina cun blera savida e gronda cumpetenza l'affar da cigaras e vegn alur sustegnida ferm da ses um Markus Wassmer. Er el è fitg empernaivel, guarda sco sia dunna bain da mintga client ed è fitg gentil. Il pèr cussegia da moda e maniera professiunala e lascha uschia daventar la cumpra da cigaras in eveniment.

Dapi il 2005 manadra da filiala

Avant 12 onns, quel mument cura che Sonja Wassmer ha surpiglià l'affar da tubac sco manadra da filiala, ha ella gi la si-

tuaziun favuraivla da surpigliar ils clients fidaivels da Peter Gautschi. 45 onns è sia butia da cigaras stada in segn tar ils buns giasts da San Murezzan. Quai è ella er oz grazia a Sonja e Markus Wassmer, duas persunas cumpetentas che vivan per lur clientella e per il lieu. La butia Davidoff da San Murezzan è en Svizra ina da quellas tschintg filialas che dastga sa numnar «Flagship-Store», ditg auter segna la butia per tradiziun, daletg ed art da fimar. Quels tschintg affars da cigaras a Basilea, Geneva, Lucerna, San Murezzan e Turitg han tuts in uschenumnà humidor transibiel, in fatg che lascha batter anc pli fitg il cor da mintga ami da cigaras.

Radund 30 000 cigaras

La collecziun e la paletta da cigaras en la butia Davidoff a San Murezzan è immens gronda. Natiralmain datti da cumprà en quel affar er autras marcas da cigaras exquisitas sco Havanna etc. En vendita vegnan dasper las cigaras Davidoff er da quellas da la Brasilia, la Cuba, l'Ecuador e Honduras. «En l'affar avain nus vers 30 000 tocs», menziuna Sonja Wassmer. Da mintga marca da cigaras è la collecziun fitg gronda e da la marca Davidoff vegn en vendita l'entir sortiment. Persunas che gaudan ina buna cigara han er gugent in whisky fin, in cognac exclusiv ubain in

rum spezial ed er en quella chaussa serva la butia da cigaras amez San Murezzan.

Damain buns affars

Sonja e Markus Wassmer chattan be buns plets per l'organisaziun dals Campiunadis mundials da skis e cunzunt er la reclama che saja strusch pajabla grazia a quella occurrenza. Lur affar, quel saja da preschent pli pauc frequentà cun esser ils giasts a Salastrains e sa divertir cun las cursas e na en vischnanca. Il pèr è dentant cuntent dad avair ina clientella fitg fidaivla, blers e buns giasts da tut il mund e cunzunt er giasts che turnan gugent ina giada ch'ils Campiunadis mundials da skis èn gia istorgia.

Ina cigara per ils Campiunadis mundials da skis

Aposta per ils Campiunadis mundials da skis han Sonja e Markus Wassmer fatg in'acziun cun la cigara «Davidoff 2000». Normal vendan els quella per 14.40 francs per toc ed ussa durant l'occurrenza da skis custa quella be 9.90 francs. L'acziun vegn stimada dals giasts e persunter survegn la manadra da la butia da tubac adina puspè resuns positivs. Dal reminent èsi pussaivel da cumprà en quel affar cigaras da diesch francs fin stgatlàs cun cigaras per in pretsch da 5000 francs.



La Confiserie e Cafè Hanselmann, ina chasa cun ina tradiziun da passa 120 onns.

FOTO G. N. STGIER

Be per l'occurrenza da skis

San Murezzan: Galaria Badrutt

■ (anr/gns) Schizunt ils galarists da San Murezzan han adattà lur exposiziuns als Campiunadis mundials da skis. Ina da las galias da renum internaziunal è la galaria Badrutt. Ella è situada en in lieu nua che mintga di passan numerusas persunas e cunzunt er da quellas che cumpran las ovras per immensas summas. En quel local singular exponan be artists enconuschents lur ovras e tar in da quels tutga er

Antonio Tamburro, il pictur-artist da l'Italia. Aposta per ils campiadis mundials ha el fatg ovras cun motifs da skiunzs e cun er esser las cursas da chavals a San Murezzan èn medemamain expoidis maletgs cun motifs dal «White Turf». Tamburro expona sias ovras adina puspè er a Berlin, Milaun, Roma, Paris, Londra, Vienna ed actualmain a San Murezzan.



Ina da las ovras da l'artist talian cun in motiv dad in skiunz.

FOTO G. N. STGIER

■ FOTO DAL DI

Villas tutgan tar San Murezzan

(anr/gns) Tut ils visitaders da las cursas da skis che van a Salastrains cun ils bus ubain a pe han er in daletg da vesair inginas villas a la Suvretta ed er a la Chantarella. Quai èn dus lieus sur San Murezzan cun ina vista magnifica sin la cuntrada autalpina da l'Engiadina Ota. Ils pretschs dal terren per bajegiar èn en quels dus lieus per meter quadrat da 30 000 francs fin 60 000 francs e be pajabels da persunas che san strusch quants milliuns ch'ellas han sin lur contos. Rehuns da l'entir mund han a San Murezzan villas er sche ellas en be occupadas paucas emnas per onn. Ils possessurs da quels bajetgs da luxus han dentant permanent ina ubain pliras persunas che tgiran lur villas.

Quella villa (da mez) ha custà bunamain 60 milliuns ed è en possess dad in commerziant da l'India.

FOTO G. N. STGIER

